

12 APR 2000

Mahathir-Tiba

DR MAHATHIR TIBA DI HAVANA UNTUK HADIRI SIDANG KEMUNCIAK SELATAN

Oleh: E.Sivabalan

HAVANA, 12 April (Bernama) -- Perdana Menteri Datuk Seri Dr Mahathir Mohamad tiba di ibukota Cuba ini pada Selasa untuk menghadiri sidang kemuncak pertama Selatan Kumpulan 77 (G-77) negara-negara membangun.

Dr Mahathir yang diiringi isterinya Datin Seri Dr Siti Hasmah Mohamed Ali tiba dengan sebuah pesawat khas di Lapangan terbang Antarabangsa Jose Marti di sini pada pukul 3 petang (3 pagi Rabu waktu Malaysia).

Perdana Menteri disambut di lapangan terbang itu oleh naib presiden Cuba Jose Ramon Fernandez.

Dr Mahathir akan menyertai para pemimpin G-77 yang lain pada sidang kemuncak dua hari itu yang bermula Rabu di Pusat Persidangan Antarabangsa di sini.

Lewat hari ini Dr Mahathir dijadual mengunjungi Presiden Cuba Fidel Castro.

Ini merupakan lawatan kedua Dr Mahathir ke Cuba, yang pertama pada 1997.

Lebih daripada 60 pemimpin dari negara-negara anggota G-77 akan menghadiri sidang kemuncak itu bersama wakil-wakil dari lebih 50 negara anggota yang lain dan 80 pertubuhan antarabangsa, menjadikannya perhimpunan terbesar pernah diadakan bagi ketua-ketua negara dan kerajaan dari negara-negara membangun.

Setiausaha Agung Pertubuhan Bangsa-bangsa Bersatu Kofi Annan dijadual turut berucap pada sidang kemuncak itu yang diadakan ketika kebanyakan negara membangun sedang pulih daripada krisis ekonomi mereka sementara yang lain terus bergelut dengan kesan buruk globalisasi dan hutang luar yang banyak.

Sidang kemuncak itu akan bermula dengan ucapan pembukaan pengerusi persidangan Chief Olusegun Obasanjo yang juga presiden Nigeria.

Fidel Castro dijadual menyampaikan kata-kata aluan selepas itu diikuti dengan ucapan Kofi Annan dan presiden Afrika Selatan Thabo Mbeki sebagai pengerusi Pergerakan Berkecuali.

Dr Mahathir turut dijadual akan menyampaikan ucapan.

Pada Khamis, para pemimpin akan berdialog mengenai tema utama sidang kemuncak itu, antara lain tentang Kerjasama Selatan-Selatan, mendefinisikan semula hubungan Utara-Selatan dan bagaimana menghadapi cabaran teknologi baru.

Sidang kemuncak itu akan diakhiri dengan program tindakan dan satu deklarasasi.

Perdana Menteri juga dijangka mengadakan perbincangan dua hala dengan beberapa pemimpin negara-negara anggota G-77 pada acara sampingan sidang kemuncak itu. Mereka termasuk pemimpin China, Surinam, Chad, Belize, Mali dan Algeria.

Dr Mahathir dijadual mengadakan persidangan berita sebelum berlepas pulang pada Jumaat.

-- BERNAMA

ES RON